



Ni Pangulong Dieter F. Uchtdorf
Ika-duhang Manuglaygay sa Unang Panguluhan

Ang Himpit nga Gugma Nagatabog sang Kahadlok

Ipaiway naton ang aton mga kahadlok kundi magkabuhi nga may kasadya, pagpaubos, paglaum, kag sang maisog nga kumpiyansa nga ang Ginuo kaupod naton.

Pinalangga kong mga kauturan, mahal nga mga abyan, isa ka pribilihiyo kag kasadya nga magkilit-anay bilang bug-os-kalibutan nga Simbahan nga nagaisa sa aton pagtuo kag pagpalangga sa Dios kag sa Iya mga kabataan.

Labi ako nga nagpasalamat sa presensya sang aton pinalangga nga propeta, nga si Thomas S. Monson. President, amon gid pirme itanom sa tagipusuon ang imo mga pulong sang paggiya, laygay, kag kaalam. Palangga ka namon, Pangulong Monson, kag pirme kami nga magapangamuyo para sa imo.

Pila ka tuig na ang nagligad, sang nagaalagad pa ako bilang stake president sa Frankfurt, Germany, isa ka pinalangga pero wala nasadyahi nga sister ang nagpalapit sa akon sang matapos ang isa sang amon mga miting sa stake.

“Indi man daw kalaw-ay?” siling niya. “Siguro may apat ukon lima ka tawo nga hamuok gid ang tulog sam-tang nagahambal ka!”

Namensar ako sing makadali kag nagsabat, “Sigurado gid ako nga ang pagtulog sa simbahan isa sang pinakamakapaayo sa tanan nga tulog.”

Ang but-anan ko nga asawa, nga si Harriet, nakabati sining kaswal nga pagsabtanay kag sang ulihi nagmuno nga amo yadto ang pinakamanami nga sabat nga akon ginhatac.

Ang Dako nga Pagkapukaw

Pila ka gatos ka tuig ang nagligad sa Aminhan nga Amerika, isa ka lihok nga ginatawag ang “Dako nga Pagkapukaw” ang naglapnag sa kabanwanhan. Isa sang tig-una nga katuyuan sini amo ang pukawan ang katawhan nga daw nagkatulog sa espirituhanon nga mga bagay.

Ang lamharon nga si Joseph Smith naimpluwensyahan sang mga butang nga iya nabatian sa mga manugwali nga nangin babin sining relihiyoso nga pagkapukaw. Isa ini sa mga rason nga nagdesisyon sia nga sinsero nga hibaluon ang pagbuot sang Ginuo sa pribado nga pangamuyo.

Ining mga manugwali may madrama, emosyunal nga estilo sang pagpangwali, nga ang mga sermon kilala sa mabug-at nga pagdagmit sang nagadaba-daba nga kalayo sang impiyerno nga nagahulut sa makasalsala.¹ Ang ila mga pamulong-pulong indi makapatulog—kundi makatuga pa gani sang indi manami nga mga damgo. Ang ila katuyuan kag metodo daw amo nga pahugon ang mga tawo agud magsimba.

Kahadlok bilang Manipulasyon

Sa kasaysayan, ang kahadlok masami nga ginagamit nga pamaagi agud paghiuong ang mga tawo. Gingamit ini sang mga ginikanan sa ila kabataan, sang mga amo sa ila mga empleyado, kag sang mga pululitiko sa mga bumuluto.

Ang mga batid sa baligyaanay nakaintiende sang gahum sang kahadlok kag masami ini ginagamit. Amo nga ang pila ka pasayod daw nagadala sang pat-od nga mensahe nga kon indi kita magbakal sang cereal para pamahaw ukon indi kita makaangkon sang pinakabag-o nga hampang sa bidyu ukon sang celfon, mahimo nga mangin miserable ang aton kabuhi, mapatay kita nga nagaisahanon kag masinulub-on.

Nagayuhum kita sa sini kag naga-pensar nga indi kita iya madala sa subong sini nga pagmanipula, pero kon kaisa nagakadala kita. Malain pa, kon kaisa nagagamit man kita sang pareho sini nga metodo agud himuong sang iban ang gusto naton.

May duha ka katuyuan ang akon mensahe karon: Ang una amo nga agdahon kita nga pamalandungan kag binagbinagon ang kadakuon nga

kita nagagamit sang kahadlok agud paisugon ang iban—lakip na ang aton kaugalingon. Ang ika-duha amo ang magpanugyan sang mas maayo nga paagi.

Ang Problema sa Kahadlok

Una, sabton naton ang problema sang kahadlok. Kon panumdumon, sin-o bala sa aton ang wala ginpadasing sang kahadlok nga magkaon sang mas makapaayo, maggamit sang seat belt, mag-ehersisy pa, magsupot sang kuwarta, ukon bisan gani maghinulsol sang sala?

Matuod nga ang kahadlok may mabaskog nga impluwensya sa aton mga aksyon kag pagginawi. Pero ang ina nga impluwensya masami umalagi lamang kag manabaw. Ang kahadlok talagsa lang nga may gahum nga baguhon ang aton mga tagipusuon, kag indi kita sini baguhon sa mga tawo nga nagapalangga sang husto kag gusto magtuman sa Amay nga Langitnon.

Ang mga tawo nga nagakahadlok mahimo nga *maghambal* kag maghimmo sang husto nga mga butang, pero indi nila *mabatyagan* ang husto nga mga butang. Masami nagabatyag sila nga wala sing may mahimo kag naghinakit, bisan kaakig. Sa kadugayan ang ini nga balatyagon nagapadulong sa pagkadula sang salig, pagkontra, bisan pagrebelle.

Sa malain nga palad, ang ining nagtalang nga pag-atubang sang kabuhi kag pagkalider indi lamang makita sa sekular nga kalibutan. Nasubuan gid ako nga mabatian nga may mga miyembro sang Simbahan nga nagagamit sang indi matarong nga pagdumala—bisan sa ila mga puluy-an, sa ila mga palangkuan sa Simbahan, sa trabaho, ukon sa ila adlaw-adlaw nga pagpakibagay sa iban.

Sa masami, ginapakamalain sang mga tawo ang pagpamigos sa iban nga tawo, pero indi nila ini makita sa ila mismo kaugalingon. Nagamando sila nga sundon ang ila indi matarong nga mga patakaran, pero kon indi pagsundon sang iban ang ining pagusto lang nga mga patakaran,

ginasilutan nila ini sa hambal, sa emosyunal, kag kon kaisa sa pisikal.

Ang Ginuo nagsiling nga “kon kita . . . nagagamit sang kontrol ukon pagdominar ukon pagpamilit sa mga kalag sang mga anak sang tawo, sa ano man nga sahi sang pagka dimatarong, . . . ang mga langit naga-atas [kag] ang Espiritu sang Ginuo nagakasubo.”²

Mahimo nga may mga tion nga nagakatentar kita nga pangatarungan ang aton mga aksyon sa pagpati nga ang resulta magapakamatarong sang pamaagi. Mahimo pa gani nga naga-pamensar kita nga ang pagkontrolar, pagmanipular, kag kaparas mangin makapaayo para sa iban. Indi ini husto, kay ang Ginuo nagklaro nga “ang bunga sang Espiritu amo ang gugma, kalipay, paghidaet, pagbatas, pagkalulo, pagkaayo, pagkatutom, pagkamapainubuson, [kag] pagpu-gong sang kaugalingon.”³

Ang Mas Maayo nga Paagi

Sa pagkilala ko pa gid sa akon Amay nga Langitnon, mas nakita ko kon paano Niya ginapadasig kag ginapanguluhan ang Iya mga anak. Indi Sia akig, madumot, ukon naga-pangita sing patas.⁴ Ang Iya mayor nga katuyuan—ang Iya buluhaton kag ang Iya himaya—amo nga tudlu-an kita, ipahitaas kita, kag tuytuyan kita padulong sa Iya kabug-usan.⁵

Ang Dios naglaragway sang Iya Misimo Kaugalingon kay Moises bilang ang “maluluy-on kag maalwan, mainantuson, kag puno sing kaayo kag kamatuoran.”⁶

Ang pagpalangga sang aton Amay sa Langit, nga Iya mga anak, labaw pa sangsa aton masarangan nga hangpon.⁷

Buot silingon bala sini nga gina-kunsinte ukon wala ginatamdi sang Dios ang mga pangginawi nga naga-lubag sa Iya mga kasuguan? Indi, pat-od gid nga wala!

Pero luyag Niya nga baguhon ang mas labaw pa sangsa aton mga pangginawi. Luyag Niya nga baguhon ang aton mismo mga kinaugali.

Luyag Niya nga baguhon ang aton mga tagipusuon.

Luyag Niya nga dab-uton naton kag kaptan sing hugot ang barandilya nga salsalon, atubangon ang aton mga kahadlok, kag maisog nga magtikang pasulong kag paibabaw sa maktid kag masipot nga banas. Luyag Niya ini para sa aton bangod palangga Niya kita kag bangod amo ini ang dalan padulong sa kalipayan.

Te, paano bala ginapaisog sang Dios ang Iya mga anak nga sundon Sia sa aton panahan?

Ginpadala Niya ang Iya Anak!

Ginpadala sang Dios ang Iya Bug-tong nga Inanak, nga si Jesucristo, agud ipakita sa aton ang husto nga paagi.

Ang Dios nagapaisog paagi sa pag-engganyo, pagbatas, pagkalulo, pagkamapainubuson, kag gugma nga wala sing pagkakuno-kuno.⁸ Kadam-pig naton ang Dios. Palangga Niya kita, kag kon masandad kita, luyag Niya nga magbangon kita, magtingu-ha liwat, kag mangin mas mabakod.

Sia ang aton manunudlo.

Sia amo ang aton dako kag gina-handum nga paglaum.

Nagahandum Sia nga paisugon kita sa pagtuo.

Nagasalig Sia nga manuto kita sa aton mga kasaypanan kag maghimo sang husto nga mga pagpili.

Amo ini ang mas maayo nga paagi!⁹

Paano ang mga Kalautan sang Kalibutan?

Isa sang mga pamaagi nga luyag ni Satanas nga manipulahan naton ang iban amo ang pag-ukot ukon bisan pa gani sang pagpadako sang kalau-tan sa kalibutan.

Matuod nga ang aton kalibutan nangin, kag padayon nga mangin, indi perpektu. Madamo kaayo nga mga inosente nga tawo ang nagaan-tos tungod sang mga sirkumstansya sa kinaugali subong man sa indi pag-katawhanon sang tawo. Ang koraps-yon kag kalautan sa aton panahan karon pinasahi kag makaalarma.

Pero wala sapayan sini tanan, indi ko pag-ibaylo ang pagkabuhi sa sini

nga tion sangsa iban pa nga tion sa kasaysayan sang kalibutan. Ginbugayen kita sing wala'y tupong agud magkabuhi sa panahon sang indi matupungan nga pagtin-ad, kinaalam, kag bentaha. Labi sa tanan, ginbugayen kita nga maangkon ang kabugusan sang ebanghelyo ni Jesucristo, nga nagahatag sa aton sang pinasahi nga panglantaw sa mga peligro sang kalibutan kag nagapakita sa aton kon paano likawan ukon atubangon ang ining mga peligro.

Kon panumdumon ko ang ining mga bugay, gusto ko nga magluhod kag magdayaw sa aton Amay nga Langitnon para sa Iya wala'y untat nga gugma para sa tanan Niya nga kabataan.

Wala ako nagapati nga gusto sang Dios nga ang Iya kabataan mangin mahinadlukon ukon magukot sa kalautan sang kalibutan. "Kay ang Dios wala maghatag sa aton sang espiritu sang katalaw; kundi sang gahum, kag gugma, kag kabut-anan."¹⁰

Ginhatagan Niya kita sang madamo nga rason para magkalipay. Kinahanglan lamang naton ini pangitaon kag kilalahon. Masami kita ginapadumdom sang Ginuo nga "dili magkahadlok," nga "magpakaligion,"¹¹ kag "dili mahadlok, diutay nga panong."¹²

Ang Ginuo ang Magaaway sang Aton Giyera

Mga kauturan, kita ang "diutay nga panong" sang Ginuo. Kita ang mga Santos sa ulihing mga adlaw. Duna sa aton ngalan amo ang pangako nga magpaabot sang pagbalik sang Manluluwas kag maghanda sang aton mga kaugalingon kag sang kalibutan agud batunon Sia. Gani, alagaran naton ang Dios kag palanggaon ang aton isigmatawo. Himuong naton ini nga may natural nga kompiyansa, nga may pagpaubos, nga wala nagapananubo sang bisan ano nga relihiyon ukon group sang mga tawo. Mga kauturan, ginsugo kita sa pagtuon sang pulong sang Dios kag

pagpamati sang tingug sang Espiritu, agud mahimo naton "mahibaluan ang mga palatandaan sang panahon, kag ang mga palatandaan sang pagkari sang Anak sang Tawo."¹³

Gani kita, indi ignorante sa mga hangkat sa kalibutan, ukon wala nakahibalo sang mga kabudlayan sang aton panahon. Pero wala ini nagakahulugan nga dapat naton pabudlayan ang aton kaugalingon ukon ang iban sang nagapadayon nga kahadlok. Imbes nga mag-ukot sa kadalagko sang aton mga hangkat sa kabuhi, indi bala mas maayo nga magtutok sa wala'y katapusan nga kahalangdon, kaayo, kag wala'y katapusan nga gahum sang aton Dios, nga nagasalig sa Iya kag nagapanghanda upod ang masinadyahan nga tagipusuon para sa pagbalik sang Jesus nga si Cristo?

Bilang Iya katawhan nga may kasugtan, indi kita kinahanglan maparalisar sang kahadlok tungod lang basi may malain nga mga matabo. Sa baylo, sarang kita maglakat pasulong nga may pagtuo, kaisog, determinasyon, kag pagsalig sa Dios samtang ginaatubang naton ang mga hangkat kag mga oportunidad nga nagaabot.¹⁴

Wala kita nagaisahanon sa banas sang pagkasumulunod. "Ang Ginuo nga imo Dios . . . nagaupod sa imo; indi sia magpabaya sa imo, ukon magbiya sa imo."¹⁵

"Ang Ginuo magpakig-away tungod sa inyo, kag kamo magpahimunong lamang."¹⁶

Sa atubang sang kahadlok, magkaisog kita, pukawon naton ang aton pagtuo, kag mag-angkon sing pagsalig sa pangako nga "wala sing hinganiban nga ginhimo batok sa imo nga magauswag."¹⁷

Nagapuyo bala kita sa panahon sang peligro kag kagamo? Matuod ini.

Ang Dios Mismo ang nagsiling, "Sa kalibutan may kangitngitan kamo: apang magpakaligion kamo; nadaug ko ang kalibutan."¹⁸

Sarang bala kita maggamit sang pagtuo kag maggiho sing nagakaangay? Sarang bala naton tungdan ang

aton mga pangako kag sagrado nga mga kasugtan? Sarang bala naton tumanon ang mga kasuguan sang Dios bisan sa mapanghangkat nga sirkumstansya? Siyempre masarangan naton!

Masarangan naton tungod ang Dios nagpangako, "Ang tanan nga butang magatingob para sa inyo kaayuhan, kon [kamo] magalakat sing tadlong."¹⁹ Gani, ipaiway naton ang aton mga kahadlok kag magkabuhi nga may kasadya, pagpaubos, paglum, kag sang maisog nga kompiyansa nga ang Ginuo kaupod naton.

Ang Himpit nga Gugma Nagatabog sang Kahadlok

Mga pinalangga kong kaabyanan, mga mahal kong kauturan kay Cristo, sa tion nga masalapuan naton ang aton kaugalingon nga nagapangabuhi sa kahadlok ukon kabalaka, ukon masalapuan naton nga ang aton mismo mga pulong, pamatasan, ukon aksyon nagatuga sang kahadlok sa iban, nagapangamuyo ako upod ang bug-os nga kusog sang akon kalag nga mahilway kita sa sining kahadlok paagi sa diosnon nga pangontra sa kahadlok: ang putli nga gugma ni Cristo, tungod kay "ang himpit nga gugma naga[tabogl] sang kahadlok."²⁰

Ang himpit nga gugma ni Cristo nagadaug sang tentasyon sa paghalit, pagpilit, pagpanakit, ukon pagpamigos.

Ang himpit nga gugma ni Cristo nagatugot sa aton nga maglakat nga mapainubuson, may dungog, kag maisog nga kompiyansa bilang mga sumulunod sang aton pinalangga nga Manluluwas. Ang himpit nga gugma ni Cristo nagahatag sa aton sing kaisog nga magpadayon sa tunga sang aton mga kahadlok kag ihamtang ang aton lubos nga pagsalig sa gahum kag kaayo sang aton Amay nga Langitnon kag sa Iya Anak, nga si Jesucristo.

Sa aton mga panimalay, sa mga lugar naton sang negosyo, sa aton mga palangakuan sa Simbahan, sa aton mga tagipusuon, buslan naton ang kahadlok sang himpit nga

gugma ni Cristo. Ang gugma ni Cristo magatal-os sang pagtuo sa kahadlok!

Ang Iya gugma magatugot sa aton nga kilalahon, saligan, kag mag-angkon sang pagtuo sa kaayo sang aton Amay nga Langitnon, sa Iya diosnon nga plano, sa Iya ebanghelyo, kag sa Iya mga kasuguan.²¹ Ang pagpalangga sa Dios kag sa aton mga isikatawo nagabaylo sang aton pagtuman sa mga kasuguan sang Dios sa isa ka bugay imbes nga sablag. Ang gugma ni Cristo magabulig sa aton nga mas mangin maayo, mas mapinatawaron, mas maatipanon, kag mas matutom sa Iya buluhaton.

Kon pun-on naton ang aton mga tagipusuon sang gugma ni Cristo, magabugtaw kita nga may mas ginpabaskog nga espirituhanon nga kapreska kag magalakat kita nga malipayon, may salig, nagamata, kag buhi sa kasanag kag himaya sang aton pinalangga nga Manluluwas, nga si Jesucristo.

Nagasaki ako, kaupod ni Apostoles Juan, “Sa gugma [ni Cristo] wala'y kahadlok.”²² Mga kauturan, mahal nga kaabyanan, ang Dios nakakilala sa inyo sing lubos. Palangga Niya kamo sing lubos. Nakahibalo Sia sang inyo palaabuton. Luyag Niya nga “Dili [kamo] magkahadlok, magtuo lamang”²³ kag “magapabilin sa iya [himpit] nga gugma.”²⁴ Amo ini ang akon pangamuyo kag bendisyon sa ngalan ni Jesucristo, amen.

MGA TANDA

1. Sanday George Whitefield kag Jonathan Edwards duha sa sikat nga mga halimbawa sang sini nga klase sang mga manugwali.
2. Doctrine and Covenants 121:37.
3. Mga Taga-Galacia 5:22–23
4. Sa isa ka tion, ang Manluluwas luyag nga magsulod sa isa ka minuro sang mga taga-Samaria, pero ginsikway sang mga tawo si Jesus kag indi Sia pagpasudlon sa ila lugar. Duha sa Iya nga mga disipulo ang nasaklaw gid tungod sini kag nagpamangkot, “Ginuo, buot Mo bala nga magsugo kami nga manao ang kalayo gikan sa langit kag sunugon sila?” Si Jesus nagsabat upod sining paandam: “Wala kamo makahibalo kon sa anong espiritu kamo. Kay ang Anak sang Tawo wala magkari sa paglaglag sang kabuhi sang mga tawo kundi sa pagluwas sa ila” (tan-awa sa Lucas 9:51–56, New King James Version [1982]).
5. Tan-awa sa Moses 1:39; tan-awa man sa Mga Taga-Efeso 3:19.
6. Exodus 34:6.
7. Tan-awa sa Mga Taga-Efeso 3:19.
8. Tan-awa sa Mga Doctrine and Covenants 121:41. Pat-od gid nga kon ang Dios naga-paabot sa aton, nga Iya mortal nga mga anak, nga maggawi sa sini nga paagi sa kada isa, Sia—isa ka tinuga nga nagahupot sang tanan nga kinaiya—amo ang modelo sang subong nga pangginawi.
9. Ang Miting sa Langit antes sa kabuhi antes pa sang kalibutan isa ka maayo nga pagtuon nga nagapakita sang karakter sang Dios. Didto ginpresentar sang Amay nga Langitnon ang Iya plano para sa aton wala'y katapusan nga pag-uswag. Mayor nga mga elemento sa sinang plano nagalakip sang pagbuot, pagtuman, kag kaluwasan paagi sa Pagpasag-uli ni Cristo. Si Lucifer, ugaling, nagplastar sang lain nga pamaagi. Gingarantiya niya nga ang tanan magatuman—wala sing bisan isa nga madula. Ang solo nga paagi agud matuman ini amo ang paagi sa pagpamilit kag pakusog. Pero ang aton mapinalanggaon nga Amay nga Langitnon indi magpasugot sang amo nga plano. Bilidhon para sa Iya ang pagbuot sang Iya mga anak. Nahibaluan Niya nga kinahanglan naton makahimo sang mga sala kon buot gid nga makatuon kita. Kag amo nga naghatag Sia sang Manluluwas, nga ang wala'y katapusan
10. 2 Timoteo 1:7.
11. Tan-awa ang, halimbawa, Josue 1:9; Isaías 41:13; Lucas 12:32; Juan 16:33; 1 Pedro 3:14; Doctrine and Covenants 6:36; 50:41; 61:36; 78:18.
12. Lucas 12:32.
13. Doctrine and Covenants 68:11.
14. Ang laygay ni Moises sa mga tawo sa iya panahon magamit sa gihapon: “Dili kamo magkahadlok. . . . Tan-awa ang kaluwasan sang Ginuo, nga himuong Niya karon nga adlaw sa inyo” (Exodo 14:13, New King James Version).
15. Deuteronomio 31:6.
16. Exodus 14:14, New King James Version.
17. Isaías 54:17.
18. Juan 16:33.
19. Doctrine and Covenants 90:24; tan-awa man sa 2 Mga Taga-Corinto 2:14; Doctrine and Covenants 105:14.
20. 1 Juan 4:18.
21. Tandaan naton nga ang Manluluwas wala nagkari “sa kalibutan sa pagtagudili sang kalibutan; kundi nga ang kalibutan maluwas paagi sa iya” (Juan 3:17). Sa matuod, “wala sia sing ginahimo nga bisan ano luwas nga ini para sa benepisyo sang kalibutan; kay palangga niya ang kalibutan, bisan nga ginhatac niya ang iya kaugalingon nga kabuhi agud mabutong niya ang tanan nga mga tawo palapit sa iya” (2 Nefi 26:24).
22. 1 Juan 4:18; tan-awa man sa 1 Juan 4:16.
23. Marcos 5:36.
24. Juan 15:10.

nga sakripisyo sarang magtinlo sa aton gikan sa sala kag magtugot sang aton pagsulod pabalik sa ginharian sang Dios.


Sang nakita sang aton Amay sa Langit nga madamo sa Iya inalangga nga kabataan ang natentar ni Lucifer, ginpilit bala Niya sila nga sundon ang Iya plano? Ginpakahuy-an bala Niya sila ukon gin-pahog yadtong mga nagahimo sadtong malaua nga pagpili? Wala. Ang aton lubos-nга-makagagaum nga Dios sarang gid magpugong sining rebelyon. Masarangan gid Niya nga piliton ang mga rebelde kag pasundon sila. Sa baylo, gintugutan Niya ang Iya mga kabataan nga magpili para sa ilia kaugalingon

10. 2 Timoteo 1:7.
11. Tan-awa ang, halimbawa, Josue 1:9; Isaías 41:13; Lucas 12:32; Juan 16:33; 1 Pedro 3:14; Doctrine and Covenants 6:36; 50:41; 61:36; 78:18.
12. Lucas 12:32.
13. Doctrine and Covenants 68:11.
14. Ang laygay ni Moises sa mga tawo sa iya panahon magamit sa gihapon: “Dili kamo magkahadlok. . . . Tan-awa ang kaluwasan sang Ginuo, nga himuong Niya karon nga adlaw sa inyo” (Exodo 14:13, New King James Version).
15. Deuteronomio 31:6.
16. Exodus 14:14, New King James Version.
17. Isaías 54:17.
18. Juan 16:33.
19. Doctrine and Covenants 90:24; tan-awa man sa 2 Mga Taga-Corinto 2:14; Doctrine and Covenants 105:14.
20. 1 Juan 4:18.
21. Tandaan naton nga ang Manluluwas wala nagkari “sa kalibutan sa pagtagudili sang kalibutan; kundi nga ang kalibutan maluwas paagi sa iya” (Juan 3:17). Sa matuod, “wala sia sing ginahimo nga bisan ano luwas nga ini para sa benepisyo sang kalibutan; kay palangga niya ang kalibutan, bisan nga ginhatac niya ang iya kaugalingon nga kabuhi agud mabutong niya ang tanan nga mga tawo palapit sa iya” (2 Nefi 26:24).
22. 1 Juan 4:18; tan-awa man sa 1 Juan 4:16.
23. Marcos 5:36.
24. Juan 15:10.

Mga Panudlo para sa Aton Panahon

Humalin sa Mayo 2017 tubtob Oktubre 2017, ang mga leksyon sa Melchizedek Priesthood kag sa Relief Society sa ikap-at nga mga Domingo ginahanda halin sa isa ukon mas madamo pa nga mga pamulong-pulong nga ginhatac sa pangkabiligan nga komperensya sang Abril 2017. Sang Oktubre 2017, ang mga pamulong-pulong mahimo nga kuhaon gikan sa Abril ukon sa Oktubre nga pangkabiligan nga komperensya. Ang mga stake kag district president dapat magpili kon ano nga mga pamulong-pulong ang pagagamiton sa ila mga lugar, ukon mahimo nila itulin ini nga responsibilidad sa mga bishop kag mga branch president.

Ang mga pamulong-pulong sarang mabasa sa madamo nga mga lenguahe sa conference.lds.org.



Ni Pangulong Thomas S. Monson

Ang Gahum sang Libro ni Mormon

Ginaalungay ko sa tagsa sa aton nga tun-an sing mainampuon kag binag-binagon ang Libro ni Mormon tagsa ka adlaw.

Pinalangga nga kauturan, mainit ko gid kamu nga ginaabi-abi nga nagkilit-anay kita liwat sa isa ka dako nga pangkabilugan nga komperensya sang Ang Simbahan ni Jesucristo sang mga Santos sa Ulihing mga Adlaw. Antes ko sugdan ang akon pormal nga mensahe karon nga adlaw, luyag ko ianunsyo ang apat ka bag-o nga mga templo nga igapasad sa masunod nga mga lokasyon: Brasilia, Brazil; Mas Nadakuan nga Manila, Philippines, area; Nairobi, Kenya; Pocatello, Idaho, USA; kag Saratoga Springs, Utah, EUA.

Sini nga aga magahambal ako parte sa gahum sang Libro ni Mormon kag sang dako nga kakinahanglan naton bilang mga miyembro sang sini nga Simbahan sa pagtuon, pagbinag-binag kag pagdapat sang mga pinanudlo sini sa aton mga kabuhi. Ang importansya sang pag-angkon sang

mabakod kag sigurado nga panaksihon parte sa Libro ni Mormon indi makabig nga sobra na katama.

Nagakabuhi kita sa panahon sang dako nga kinagamo kag kalautan. Ano ang magaproteksyon sa aton batok sa sala kag kalautan nga nagakatabo sa kalibutan karon nga panahon? Ginapanindigan ko nga ang mabakod nga panahsihon parte sa aton Manluluwas, nga si Jesucristo, kag sang Iya ebanghelyo magadala sa aton sa kaluwasan. Kon wala pa kamo nagabasa sang Libro ni Mormon kada adlaw, palihog himoa na ninyo. Kon basahon ninyo ini sing mainampuon kag upod ang matuod-tuod nga handum nga hibaluon ang kamatuoran, ang Balaan nga Espiritu ang magapakita sang kamatuoran sini sa inyo. Kon matuod ini—kag sinsero ako nga nagasaksi nga ini *amo*—dayon si Joseph Smith isa sadto ka propeta

nga nakakita sang Dios nga Amay kag sang iya anak, nga si Jesucristo.

Tungod matuod ang Libro ni Mormon, ang Ang Simbahan ni Jesucristo sang mga Santos sa Ulihing mga Adlaw amo ang Simbahan sang Ginuo sa kalibutan, kag ang balaan nga priesthood sang Dios ginpanumbalik para sa kaayuhan kag bugay sang Iya mga anak.

Kon kamo wala pa sing matuod sing panaksihon sang sining mga butang, himua inang ginakinahanglan agud makaagom kamu sang isa. Importante para sa inyo nga mag-angkon sang inyo kaugalingon nga panaksihon sa tunga sining mabudlay nga panahon, kay ano lang man ang malab-utan ninyo paagi sa mga panaksihon sang iban. Ugaling, kon mabaton na ninyo, ang panaksihon kinahanglanon nga tipigan nga mabaskog kag buhi paagi sa padayon nga pagtuman sang mga kasuguan sang Dios kag paagi sa pagpangamuyo kag pagtuon sang balaan nga kasulatan kada adlaw.

Pinalangga ko nga mga kaupdanan sa buluhaton sang Ginuo, ginaalungay ko sa tagsa sa aton nga tun-an sing mainampuon ang binag-binagon ang Libro ni Mormon tagsa ka adlaw. Kon himuong naton ini, mangin yara kita sa posisyon agud mabatian ang tingug sang Espiritu, sa pagbato sa pagduda kag kahadlok, kag sa pagbaton sang bulig sang langit sa aton mga kabuhi. Bug-os tagipusuon gid ako nga nagasaksi sa ngalan ni Jesucristo, amen.